

KONTROL MOZIOA

AMARA KALEKO ELKARTEEN LOKALEI BURUZKOA

Jon Markel Ormazabal Gaztañaga EH Bildu udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2021eko otsailaren 15ean Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

2020ko urriaren 27an hartu zuen Udal Gobernuak Amara kaleko hiru eraikin hustu eta eraisteko erabakia. Udal teknikarien arabera, “egiturazko patologia larriak” dituzte 11., 13., eta 17. zenbakiko eraikinek, eta segurtasun arrazoiengatik botako dituzte. Udalak iragarri zuen hiru eraikinetan bizi diren familiei Morlansen emango dietela aldi baterako bizilekua. Ordea, egoera horrek auzoko bost eragile kaltetzen ditu: Amara Bai auzo elkartea, Amarako Jai Batzordea, Mamur haurrentzako aisialdi taldea, Amara Kirol Elkartea (AKE) eta Moxolo gazte elkartea. Izan ere, eta elkarteek salatu bezala, “bizilagunei Morlansen eskaini diete ordezeko etxea eta elkarteei, berriz, beste lokalen bat uztekotan, auzotik at”.

Amara kaleko eraikinak eraitsiko zituztela jakinarazi zenetik, bilera eta hartu-emanak izan dira auzoko elkarte hauen eta udal ordezkarien artean, itxitako lokalei alternatibak bilatzeko helburuarekin. Zenbait elkarte jakinarazi dutenez, bilera hauetan hainbat aukera jarri ziren mahai gainean, hala nola, Amara Bai auzo elkarteari Morlans auzoan egokitzeko proposamena edo Moxolo gazte elkarteari hasieran San Bartolomen eskainitakoa. Eta “hasieran” diogu, eskainitako lehen lokal horri ezezkoa eman ziolako gero Udal Gobernuak, horren ordezkari Bidebietako Kontadores Gazte Zentroan lekua eskainiz.

Egoera honen berri emateko, Mamur, Amara Jaiak eta Moxolo elkarteek auzoko eskaratzetan banatutako idatzian argi adierazten da auzotarren ezinegona:

“Auzoko bizitzako ia alderdi guztietan jarduten duten eragileak izanik, ondorio latzak ekarriko ditu amaratar guztiontzako haien desagerpenak. Kanporatuz gero, ezingo baitute auzotarrentzako lan egin.”

Udal ordezkariak elkarteekin bildu izan direla baieztatu zuen Hirigintza Sostengagarriko zinegotzi ordezkari eta lehen alkateorde Nekane Arzallus Iturriak, 2021eko otsaileko Pertsonentzako Zerbitzuen Batzordean. Baina, aldi berean, elkarteei alternatibarik eskaini ez bazaie, Amara auzoak egun duen lokal faltagatik izan dela gaineratu zuen.

Baina, elkarteek nabarmendu dutenez, aukerak, egon, badaude. Horietako bat da Arroka plazako udal-ekipamenduko eraikina, Easo kaleko Suhiltzaileen Etxea izandakoa eraberritzen den bitartean, Udalinfo-ren egoitza gisa erabiltzen dena. Suhiltzaileen Etxe zaharra bera ere aukera bat da, izan ere, berau biltegi bezala erabiltzeko eskaintza ere mahai gainean egon da. Eta azkenik, Mentxu Gal parkeko komunak daude. Gogoratu behar da Donostiako Udalak aipatu komunak kafetegi bihurtzeko proiektua onartu zuela 2018ko urtarrilean, nahiz eta bideragarritasun ekonomikorik ez zuela argudiatuta, proiektua garatu behar zuen enpresak esleipenari uko egitea erabaki eta asmoa bertan behera geratu zen. “Eraikinaren tamainak ez du ematen horrelako negozio bat bideragarria egiteko”, adierazi zuen Eneko Goia alkateak orduko hartan, eta ondorengo gaineratu: “Aukera guztiak aztertuko ditugu, eta ez da baztertzen eraikina handitzea. Halere, lorategia eta komunak errespetatu behar direla badakigu”.

Aukerak, beraz, egon, badaude; aitzitik, agerikoa da aukera hauek egikaritzeak aipatu eraikinetan esku-hartzeak eta egokitzapenak beharrezkoak egiten dituela. Are eta gehiago, elkarte hauetako zenbaitek egiten duten zentzuzko eskakizuna aintzat hartzen bada: alegia, Amara kaleko eraikinak hustu aurretik elkarteen lokalek eskaintzen zizkieten baldintza berberak betetzea: “gure jarduna eta gure aisialdia aurrera eramateko gure auzoan espazio bat edukitzea”.

Horregatik guztiarengatik, honako hau da behean sinatzen duen zinegotziak aurkeztutako **KONTROL MOZIOA:**

EH Bildu talde politikoa

Grupo político EH Bildu

Ijentea, 1 - 20003 Donostia Tel. 943481027 eh_bildu@donostia.eus-- www.donostia.ehbildu.eus -

1.- Donostiako Udaltzarak hertsatuki eskatzen dio Udal Gobernuari bila eta eman diezaiola soluzioa Amara auzoko elkarten lokal faltari, lehenbailehen, kaltetutako elkarteekin elkarlanean, eta auzo-eragileak diren heinean alternatibak auzoan bertan lekutuz.

Donostian, 2021eko otsailaren 19an

Jon Markel Ormazabal Gaztañaga
EH Bildu udal taldeko zinegotzia